

歷代職官表

冊
一

歷

江苏工业学院图书馆
藏書章

職官表

四部備要

史部

上海中華書局據武英殿

本校刊

桐鄉 陸費達總勘

杭縣 高時顯輯校

杭縣 吳汝霖監造

丁輔之

多羅質郡王

臣

永琰等奉

勅修纂歷代職官表全書告成謹奉

表恭

進者伏以

天祐命而樹之君式布亮工之典

聖建邦而分之職聿昭熙績之經自雲紀龍紀鳥紀火紀以來代多因革惟汝
翼汝爲汝明汝聽之訓人奉憲章蓋責實者必循其名而證今者貴求諸
古欽惟我

皇上

道備君師

治臻魏煥

綜萬幾以兢業

咨百爾以弼諧慎乃憲省乃成一心正朝廷之本疇若工咨若采六事秉綱

紀之原緬我

朝勅制顯庸監往古而立極繫

列聖建官位事垂永世以重光八旗列而大告乎

武成三院興而肇敷乎

文治爰逮彌綸於六合實先澄敘夫九流凡貽諸奕世而不爲承皆鑒於前代之所以失時庸惇敘而宗藩鈐束之迹除奉揚

絲綸而中書票擬之弊革用人由

特簡而法不撓於廷推封事盡昌言而習不流於私訐著會讞覆奏爲定制而一洗廠衛之灼薰領七司三院以重臣而悉屏奄寺之竊弄至於典因時制事不前承伯克宰桑合舊藩新部而儋爵祿火器健銳並列營超隊以著旗常駐防則布在雄疆肅如禁旅領直則置因延閣典重祕書其他內綱外維率以遵王之道遵王之路小廉大法俾之罔有不欽罔有不臧斯則凜

聖神之作述以勵庶官亶惟仰

睿智之照臨以迪允德

治既光於往古

訓實示乎周行乃者因略錄之蒐羅卽班聯而尋泝猥以

鉅製

命及諸臣采表體於遷固之編考命官自唐虞之冊累代則相銜而下異同損益之畢陳分曹則就列以班詳略是非之互見或稱名惟舊而考職多殊或班爵由今而尋源不別或臚諸往牒而功令從芟或徵自新銓而史策未備莫不衷諸典要觀其會通上本六經旁參百氏繁則連牘簡或片言期於準我

朝之美備以等百王足使昭有位之箴規以

詔後世發凡起例早欽體要之

親宣正舛訂譌復荷精微之頻

示迭更寒燠載藏簡編粵稽書載官儀勅由應劭迨六典百司之作遞有鋪張
越具員分紀之編非無纂述集賢承旨每偏舉其頭銜官制職林或拘限
於時代惟樂安任戩氏頗及沿革之大凡而官品纂要書未致古今之詳
備方斯

祕帙譬若椎輪蓋惟

聖人著作之大成永爲萬古臣鄰之極則豈徒誇其博綜軼彼類林而已哉
臣
等忝預編摩竊慚蕪陋稽古卽所以奉職恆虞鉛槧多疏顧名因藉以誦
箴敢不冰淵共凜樹三宅三俊之範

敷文命以裕無疆宏五服五章之謨際

昌期而瞻有耀

臣

等無任瞻

天仰

聖踴躍欣忭之至謹奉

表恭

進以

聞

上諭

乾隆四十五年九月十七日奉

上諭國初設官分職不殊周官法制及定鼎中原參稽前代不繁不簡最爲詳備其間因革損益各異實同稽古唐虞建官惟百內有百揆四岳外有州牧侯伯奮庸熙載亮采惠疇周則監於二代立三公三孤秦漢以後爲丞相爲中書門下平章知政事明洪武因胡惟庸之故改丞相爲大學士其實官名雖異職守無殊惟在人主太阿不移簡用得人則雖名丞相不過承命奉行卽改稱大學士而所任非人竊弄威福嚴嵩之流非仍名大學士者乎蓋有是君方有是臣惟后克艱厥后庶臣克艱厥臣昔人言天下之安危係乎宰相其言實似是而非也至六官卽今之六部周禮典制綦詳要亦本於唐虞司徒秩宗諸職外而督撫自秦漢以來所稱守牧節度行省卽唐虞十二牧之遺歷朝改革建置紛如難以勝數我國家文武內外官職品級載在大清會典本自秩然至于援古證今今之某官卽前某代某官又或古有今無或

古無今有允宜勒定成書昭垂永久俾覽者一目了然現在編列四庫全書遺文畢集著卽派總纂總校之紀昀陸費墀陸錫熊孫士毅等悉心校覈將本朝文武內外官職階級與歷代沿襲異同之處詳稽正史博參羣籍分晰序說簡明精審毋冗毋遺其議政大臣領侍衛內大臣八旗都統護軍統領健銳火器營內務府並駐防將軍及新疆增置各官亦一體詳晰考證分門別類纂成歷代職官表一書由總裁覆核陸續進呈候朕閱定書成後卽以此旨冠於卷首不必請序列入四庫全書刊布頒行以昭中外一統古今美備之盛因首論丞相一官餘可類推覽是篇者其各顧名思義凜然于天工人代兢兢業業夙夜靖共以庶幾克艱無曠之義欽哉特諭欽此

乾隆四十八年十月初二日奉

上諭朕閱館臣所進職官表志詹事府一門其按語內稱詹事爲東宮官屬我國家萬年垂統家法相承不事建儲冊立詹事府各員留以備詞臣遷轉之階等語是書館臣因朕前降諭旨於建儲一事之斷不可行明切訓示故據

按語內特爲揭出其實書生拘迂之見豈能深計及此且使是書流傳後世
安知不又訾議館臣爲無奈迎合諭旨非其本懷耶用是不得不再爲明白
宣諭夫堯授舜舜授禹唐虞固公天下卽禹之傳啓亦非於在位時有建立
太子之事三代以後人心不古秦漢預立太子其後爭奪廢立禍亂相尋不
可枚舉遠而唐高祖立建成爲太子至於兄弟相殘建成被害近而明神宗
朝羣臣奏請預立國本紛紜擾亂大率皆爲後來希榮固寵之地甚至宵小
乘間伺釁釀爲亂階如梃擊等案神宗召見太子泣爲慰藉父子之間至於
如此閱之真可寒心可知建儲冊立非國家之福召亂起釁多由于此卽以
我朝而論

皇祖時理密親王亦嘗立爲皇太子且特選公正大臣如湯斌者爲之輔導乃
旣立之後情性乖張卽湯斌亦不能有所匡救羣小復從而蠱惑遂至屢生
事端上煩

皇祖聖慮終至廢黜且卽理密親王幸而無過竟承大統亦不過享國二年其

長子弘皙縱欲敗度不克幹蠱年亦不永使相繼嗣立不數年間連遭變故
豈我大清宗社臣民之福乎是以

皇祖有鑒于茲自理密親王既廢不復建儲迨我

皇祖龍馭上賓傳位

皇考紹登大寶十三年勵精圖治中外肅清

皇考敬法

前徽雖不預立儲位而於宗祏大計實早爲籌定雍正元年卽

親書朕名緘藏於乾清宮正大光明匾內又另書密封一匣常以隨

身至雍正十三年八月

皇考升遐朕同爾時大臣等敬謹啓視傳位於朕之

御筆復取出內府緘合密記合對脗合人心翕然此天下臣民所共知者朕

登極之初恪遵

家法以皇次子乃

孝賢皇后所生嫡子爲人端重醇良依

皇考之例曾書其名藏於乾清宮正大光明匾額後乃稟命不融未幾薨逝遂命大學士鄂爾泰張廷玉將其名撤出追諡爲端慧皇太子是未嘗不立嫡也但不以明告衆耳嗣後皇七子亦

孝賢皇后所出秉質純粹深愜朕心惜不久亦卽悼傷其時朕視皇五子于諸子中覺貴重且漢文滿洲蒙古語馬步射及算法等事並皆嫻習頗屬意于彼而未明言乃復因病旋逝設依書生之見規仿古制繼建元良則朕三十餘年之內國儲凡三易尙復成何事體是以前於癸巳年復書所立皇子之名藏於匣內常以自隨是年

南郊大祀令諸皇子在

壇襄事曾以所定皇子默禱於

上帝若所定之子克承堂構則祈

昊蒼眷佑俾得年命延長倘非

天意所屬則速奪其算朕亦可另爲選擇毋悞我國家宗社生民重寄本年恭詣盛京祇謁

祖陵亦如告

天之言默祝於

太祖

太宗之前仰祈

靈爽式憑永垂昭鑒朕非不愛子也朕以宗社爲重若朕之子孫皆以朕此心爲心實大清國億萬斯年之福也今日召對諸皇子及軍機大臣面降此旨卽朕前所默告

上帝

祖

宗之言豈容有絲毫虛飾耶朕於天下一切庶務無不宵旰勤求悉心籌畫寧於繼體託付之重轉不早爲定計乎秋間朕於避暑山莊河岸御鎗打鴉鵲

失足落水溼衣其時不特御前王公大臣等聞知俱卽趨至問安卽漢軍機大臣亦接踵前赴該處朕仍率伊等談笑而行並未有因內廷禁地太監等敢於阻止設朕起居偶有違和大臣等俱可直詣寢所此皆由朕平日君臣一體無日不接見諸臣面承諭旨何至有若前代夜半禁中出片紙之語爲杞人之憂乎總之建儲一事卽如井田封建之必不可行朕雖未有明詔立儲而於

天

祖之前旣先爲齋心默告實與立儲無異但不似往代覆轍之務虛名而受實禍耳故現在詹事官屬雖沿舊制而其實一無職掌祇以備員爲翰林陞轉之資耳因再明切宣諭我子孫其各敬承勿替庶幾億萬年無疆之休其在斯乎總之此事朕亦不敢必以爲是其有欲遵古禮爲建立之事者朕亦不禁俟至於父子兄弟之間猜疑漸生釀成大禍時當思朕言耳並諭館臣將此旨冠于是編之首俾天下萬世咸知朕意欽此

